

Despotisme dans des domaines gouvernés par des Jésuites

Lu Ban d' Mûno et ses Sègneurs.

Mûno e-st in ptit viadje acwati (*blotti*) dlé la frontîre francesse, al cwète des cresses ârdenesses et des mâvês vants.

Lu ban, loû, su stindot du dlé la Smwa a Cugnon jusk' al frontîre francesse, nin lon d' Ivoû [*Yvois*], Carignan, asteure.

Si on rwête la carte du Ban d' Mûno, on wèt k' i rsanne a in grand **A**, raclôs su l' ombrant [*au couchant*] pal Dutchiye du Bouyon, ki sît [*suit*] dabôr tout l' timp in rouchê [*ruisseau*], al manîre du dèlimiter les payis dvè l' VIIime siéke.

Lu costé du Lvant sît les vîs tchmins, tant k' on-z est din les bwès, pîs duvint pus crawiyeû [*tortueux*] din les viadjes. Lu mîdi est francès.

Lu dzeu du ban, ki pâte [*part*] dul Sumwa dulé Cugnon et duschind ou mîdi, in pô oûte dul vôle Bouyon-Floravile, n' ére din l' timp et n' est co anute k' in grand sâvadje et spès bwès. Ni viadje, ni ècart, rin k' dès âbes.

A ponne rêchus du bwès, lu payis s' aclérit. Finis les profondes futêyes ! Dju sans din la Gâme.

Rassannés alantou d' Mûno, bin a cwète [*à l'abri*] durî les yôtes cresses d' Årdène, Lambermont, Watrinsât, Pèransârt et kékes putits ècartis adossis a France su soriyat pâjurmint ou Mîdi [*s' étalent paisiblement au soleil*].

In ptit payi ki n' ârot jamwê d' istwâre. Et pourtant ...

Les banîs [*habitants du ban*] d' nôs ptits viadjes, ki s' sintint bin mâ a l' êje, rassêrés k' il astin, atèr les deus dutchiyes du Bouyon et d' Lucsambour, avin kèru édance du tous costés, ou comte du Chiny, ou prince du Lorinne, ou prince du Sdan, minme a dovrant leu boûsse et souvint a leus dépans. Vous savèz bin ç' ku c' est d' esse putit !

Lu pus bê du djeu, c' est k' il avin co, dlé l' viadje, ene prîriye [*prieuré*] ki dèpandot d' l' abiye du Sint Vane a Verdun et k' ére dèdja la ou XIime siéke, adon k' lu sprituwel dèpandot d' Tréve.

D' après dâcuns, ç' ârot sté in comte Herman d' Bouyon k' ârot dné des privilîdjes al prîriye ; d' après lz ôtes, Herman n' avot Mûno ku coume apanadje, in janre d' uzufroût [*usufruit*], et k' i n' avot rin a dire a ça. Ki fut ki swat, la prîriye avot des avantadjes.

A 1525, prêmîre margaye atèr l' èvêke du Verdun et deus clercs du Lîdje, yink k' on loumot Sèmry. Yink dijot k' il avot sté rcounu pa Charles-Quint lu 25 du jun 1525 ; l' ôte achûrot awè sté établi pa l' èglîje lu 25 du julièt 1525.

Les Sèmry astin des djîns sins fiyate [*sans confiance aucune*]. I promètin tout ç' k' on vlot, mès nu payin jamwê rin. Il è falu ku l' Pape s' a mèle, mès cand l' Pape è oyu mètu in priyeu, l' èvêke du Verdun nn è mètu èn ôte, ki vnot d' Mouzon et tout ça è trinné juska 1574.

Dj' arivans ou moumint k' les Jèzwites du Lîdje vunat d' pinde leu crami [*crémaillère*]. Pou mète fin às bisbroûyes ku dju vnans d' câzer, l' èvêke du Lîdje, k' ére ossi duc du Bouyon, è crû bon amonner les Jèzwites a Mûno, mès l' èvêke du Verdun nu l' atindot nin insi et il è rkèsté la Dutchyie du Lucsambour conte du Bouyon, ki vnot d' mète Mûno dzou sèkesse [*séquestre*].

Les jèzwites, zès, fujin tout pou gangnî leu-z indèpandance. Foute lu tchin din les pouyes du tous costés, et su ç' timp la, mwêstriyî [*maitriser*] Mûno d' pus a pus. Il avin minme suté jusk' a rmonter in djibet, mès Bouyon l' è dustroût, et la prîriye è rèclamé a Lucsambour.

Cand l' Duc du Bouyon vlot impôzer yâk, les jèzwites rukèstin l' èvêke du Lîdje. Cand, pus târd, Louwis XIV s' è rindu mwêsse des Dutchiyes, les jèzwites a-n ont profité pou crèyer in nouvê côde et rafwarcî leu-z influwance, mès ça n' è nin toudi routé coume i croyin.

A 1729, il ont volu vrêmint duvnu les mwêsses du ban et il ont rêvé du fwêre des prîjons plin les caves dul prîriye et in deujime côp du rulver l' djibet, in djibet coume on nn avot co pont vû, soutnu pa trwas colones du pîres. Vrêmint l' imådje du leu pouvwar.

Lu maçon rkèsté pou fwêre lu djibet alot zesse lu prêmî a l' sutrimer. I n' s' a doutot wêre, cand il è dmandé às jèzwites : " Coumint k' vous vlèz k' dju l' fwêje ? " et k' i lî ont ruspondu : " Fwês l' coume pour ti ! "

Lu 7 du fèvrî 1730, lu mwêsse dul fêche [*procureur fiscal*] è arété nosse maçon, Toma Signorê et du côp, è fwêt vinde ses meubes a Carignan. Il è pris kékes ignorants pou-z êdî les jujes et la ponne du mwârt è sté dècidéye conte du Thomas, a djant k' i n' avot nin payî ene nouvèle rudvance.

Lu 18 du fèvrî, lu tribunâ rindot l' arèt d' mwârt, et a 11 eûres, Toma Signorê astot pindu ou djibet k' i vnot d' achèver.

Lu djoû du dvant, il avin arété s' frère Flipe, pask' il avot sayî d' mète ene putite djâbe al place d' ene grosse din sa pàrt du dûme. On n' è ddja pont fwêt d' procès, mès seulmint dmandé a yink s' il astot dacôr k' on pinje [*pende*] lu Flipe.

Et, ç' djoû la a midi, lu Flipê astot pindu. Mès l' pindeû, croyant l' vèy mwârt, è côpé la cwade. Nosse Flipe è tumé su in tas d' pîres et ou d' bout d' in moumint, i ravicot.

Sa fame et ses afants ont adon supliyî la grâce du malèreus, mès i gn è rin yu a fwêre. Lu pindeû è dvu rataker sa bzougne jusk' al mwârt du pôve Flipe, k' il è sté oblîdjî du "bioner". On n' sét nin cè k' ça vut dire ; on sondje ku c' est l' achèver pa tous les moyins. [NDR (note du ruscrijheu) û moutè bâyouner = *mettre un baillon*]

Les vèves [*veuves*] ont dvu ratinde 1741 pou touchî in pô yâk. Les jèzwites avin catchî tous les papîs des procès et personne nu les vlot rapwarter.

K' è-t i advunu d' tout ça ? La prîriye et toutes les dépendances, tchamps et bwès, ont sté vindus. A 1787, les Otrichyins vindint les molins du Lambermont et Mûno. Duvé 1795, la Rèpublike francesse vindot la prîriye et les dépendances, sins les 1227 ectares du bwès, a in certin Dumont, d' Îzel..

Cut-ci s' a dusfujot dvè 1815 à profit du deus Francès, Bosson et Labbie ki, a 1817, les rvindin a ptits bokèts às particuliers.

A 1845, la prîriye astot rachté pa in certin Isidore Conro.

Les bwès, zès, ont sté vindus pàs Olandès a MM. Rogissart, Van den Bosche et al comune du Mûno.

La prîriye est toudi la, pou narguer les ddjans du viadje k' ont tant soufru dèrant pus d' 300 ans.

Si z alèz a Mûnô, nu câzèz nin d' trop d' Jèzwites ; i n' î sont nin trop bin vûs.

Louwis Bêdjot – 28 Avri 1999, [Coutcouloudjou](#) n° 40 (mai 1999); lu dètay du tout ça, vous plèz l' lire din " Histoire de la Ville et du Duché de Bouillon, par M.J.F. OZERAY – Bruxelles 1864. Reproduction anastaltique " Ed. Culture et Civilisation, Bruxelles 1974 ".